

四部叢刊初編史部

通鑑外紀

十卷
目錄五卷

上海涵芬樓藏明
刊本原書板心高
營造尺六寸七分
寬四寸七分

資治通鑑外紀序

道原好著書志欲籠絡宇宙而無所
遺其著資治通鑑外紀十卷未以傳
人病亟猶汲汲借人書以叅校已之
書是正其失氣垂盡乃口授其子義
仲爲書凡使撰外紀序皇祐初有詔
士能講經義者聽別奏名其中所對

最精諱先具疏次引先儒異說末以
已意斷而論之凡二十問所對皆然
主司驚異擢爲第一及發糊名迺進
士劉恕年十八矣光以是慕重之始
與相識道原乃其字也釋褐鉅鹿主
簿遷和川令英宗雅好稽古詔光
編次歷代君臣事仍謂光曰卿自擇

館閣英才共修之光對曰館閣之士
誠多至於專精史學臣未得而知所
識者惟和川劉恕一人而已上曰甚
善卽奏召之共修書凡數年史事之
紛錯難治者則以誘之光仰成而已
今上卽位賜名曰資治通鑑道原所
編之事皆在通鑑之前故曰外紀焉

光尋判西京留臺奏遷書局後數年
道原至洛歸局中以元豐元年九月
戊戌終官至祕書丞年止四十七嗟
乎以道原之耿介其不容於人齟齬
以沒固空天何爲復病而天之耶此
益使痛惋愴怳而不能忘者也道原
其先萬年人祖度爲臨川令卒官葬

高安因家焉元豐元年十月日涑水
司馬光君實序

劉恕曰孔子作春秋筆削美刺子游子夏門人之高第不能措一辭魯太史左丘明以仲尼之言高遠難繼而爲之作傳後之君子不敢紹續焉惟陸長源唐春秋尹洙五代春秋非聖人而作經猶春秋吳楚之君僭號稱王誅絕之罪也左氏傳據魯史因諸侯國書繫年敘事春秋所貶損大人當世君臣有威權勢力其事實皆形於傳

故隱其書而不宣以免時難後漢獻帝以
班固漢書文繁難省命荀悅依左傳體爲
漢紀言約事詳大行於世晉太康初汲郡
人發魏襄王冢得紀年文意大似春秋其
所記事多與左氏符同諸儒乃知古史記
之正法自是袁宏張璠孫盛干寶習鑿齒
以下爲編年之書至唐五代其流不廢漢
晉起居注梁唐實錄皆其遺制也國語亦

左丘明所著載內傳遺事或言論差殊而
文詞富美爲書別行自周穆王盡晉知伯
趙襄子當貞定王時凡五百餘年雖事不
連屬於史官蓋有補焉七國有戰國策晉
孔衍作春秋後語竝時分國其後絕不錄
焉唐柳宗元采摭片言之失以爲誣淫不
槩於聖作非國語六十七篇其說雖存然
不能爲國語輕重也司馬遷始撰本紀年

表八書世家列傳之目史臣相續謂之正
史本朝去古益遠書益煩雜學者牽於屬
文專尚西漢書博覽者乃及史記東漢書
而近代士頗知唐書自三國至隋下逮五
代懵然莫識承平日久人愈怠惰莊子文
簡而義明玄言虛誕而似理功省易習陋
儒莫不尚之史學淺微矣案歷代國史其
流出於春秋劉歆敘七略王儉撰七志史

記以下皆附春秋荀勗分四部史記舊事
入丙部阮孝緒七錄記傳錄紀史傳由是
經與史分夫今之所以知古後之所以知
今因善惡以明褒貶察政治以見興衰春
秋之法也使孔子贊易而不作春秋則後
世以史書爲記事瑣雜之語春秋列於六
藝愚者莫敢異說而終不能曉也愨皇祐
初舉進士試於禮部爲司馬公門生侍於

大儒得聞餘論嘉祐中公嘗謂恕曰春秋
之後迄今千餘年史記至五代史一千五
百卷諸生歷年莫能竟其篇第畢世不暇
舉其大略馱煩趨易行將泯絕予欲託始
於周威烈王命韓魏趙爲諸侯下訖五代
因丘明編年之體倣荀悅簡要之文網羅
衆說成一家書恕曰司馬遷以良史之才
叙皇帝至秦漢興亾治亂班固已下世各

名家李延壽總八朝爲南北史而言詞卑
弱義例煩雜書無表志沿革不完梁武帝
通史唐姚康復統史世近亾軼不足稱也
公欲以文章論議成歷世大典高勳美德
褒贊流於萬世元凶宿姦貶絀甚於誅殛
上可繼仲尼之經丘明之傳司馬遷安可
比擬荀悅何足道哉治平三年公以學士
爲英宗皇帝侍講受詔修歷代君臣事迹

恕蒙辟寘史局嘗請於公曰公之書不始於上古或堯舜何也公曰周平王以來事包春秋孔子之經不可損益曰曷不始於獲麟之歲曰經不可續也恕乃知賢人著書尊避聖人也如是儒者可以法矣熙寧三年冬公出守京兆明年春移帥潁川固辭不行退居洛陽恕褊狃好議論不敢居京師請歸江東養親公以新書未成不廢